

gustav / January 19, 2013 10:28AM

[Re: 《文昌帝君陰騭文》](#)

「修數百年崎嶇之路，造千萬人來往之橋」之大願，如《[關聖帝君降筆真經](#)》所言：「直心直受真福，巧計巧來禍心。」大直之道往來之橋，不過乎誠意正心，若非意誠心正，一切持身持家持國之施皆為巧佞，諸禍之端也！

Edited 1 time(s). Last edit at 01/19/2013 03:37PM by gustav.

gustav / January 19, 2013 12:31AM

[《文昌帝君陰騭文》](#)

成書於宋元時的《文昌帝君陰騭文》簡稱陰騭文，是一篇駢文，以文昌帝君本人的口吻來講述其化身與訓示，列舉古代士人行善得福的事例，說明善有善報、惡有惡報，「近報則在自己，遠報則在兒孫」的因果報應，勸人行善積德。（[wikipedia](#)）

《文昌帝君陰騭文》

吾一十七世為士大夫身，未嘗虐民酷吏。

救人之難，濟人之急。

憫人之孤，容人之過。

廣行陰騭，上格蒼穹。

人能如我存心，天必賜汝以福。

於是訓於人曰：

昔於公治獄，大興馴馬之門。

竇氏濟人，高折五枝之桂。

救蟻中狀元之選，埋蛇享宰相之榮。

欲廣福田，須憑心地。

行時時之方便，作種種之陰功。

利物利人，修善修福。

正直代天行化，慈祥為國救民。

忠主孝親，敬兄信友。

或奉真朝斗，或拜佛念經。

報答四恩，廣行三教。

濟急如濟涸轍之魚，救危如救密羅之雀。

矜孤恤寡，敬老憐貧。

措衣食周道路之饑寒，施棺槨免屍骸之暴露。
家富提攜親戚，歲饑賑濟鄰朋。
斗秤須要公平，不可輕出重入。
奴僕待之寬恕，豈宜備責苛求。
印造經文，創修寺院。
捨藥材以拯疾苦，施茶水以解渴煩。
或買物而放生，或持齋而戒殺。
舉步常看蟲蟻，禁火莫燒山林。
點夜燈以照人行，造河船以濟人渡。
勿登山而網禽鳥，勿臨水而毒魚蝦。
勿宰耕牛，勿棄字紙。
勿謀人之財產，勿妒人之技能。
勿淫人之妻女，勿唆人之爭訟。
勿壞人之名節，勿破人之婚姻。
勿因私讎，使人兄弟不和；勿因小利，使人父子不睦。
勿倚權勢而辱善良，勿恃富豪而欺窮困。
善人則親近之，助德行於身心。
惡人則遠避之，杜災殃於眉睫。
常須隱惡揚善，不可口是心非。
剪礙道之荊榛，除當途之瓦石。
修數百年崎嶇之路，造千萬人來往之橋。
垂訓以格人非，捐貲以成人美。
作事須循天理，出言要順人心。
見先哲於羹牆，慎獨知於衿影。
諸惡莫作，眾善奉行。
永無惡曜加臨，常有吉神擁護。
近報則在自己，遠報則在兒孫。
百福駢臻，千祥雲集。

豈不從陰鸞中得來者哉！

Edited 1 time(s). Last edit at 01/19/2013 12:31AM by gustav.
